



PBz  
Apr 07 2024, 15:48

**SUMTUKPHAI KOCHUAM VENA PROGRAMME (7-04-2024)**



PBz  
Apr 07 2024, 14:22

To, \_\_\_\_\_  
\_\_\_\_\_

*If undelivered please return to* - TPC Office,  
P.O. Box - 107  
D. Phailian,  
Churachandpur - 795128  
Manipur, India



ESTD. MARCH 2008  
MAY 2024  
Monthly Christian Magazine  
**Hinna Vâk**  
AN ORGAN OF THE TANGPHAI PRESBYTERIAN CHURCH



**MISSIONARY DAY LEH TANGPHAI KOCHUAM**

- Chanchinphai dawi um chiajel in
- Thagau Thiangtho apat halthakna
- Khanglaite leh Revival
- Myanmar Gamthak Nasepna Report

**Editor** : Rev. S. Lama Vaiphei, Executive Secretary

**Joint Editors** : Rev. P.B Zosapthara, Consultant  
: Rev. K. Jama Vaiphei  
: Rev. Th. Samuel Vaiphei  
: Upa Lalminsang  
: Upa S. Lalpi  
: Pi Hawipakkim, Secretary, CKNP  
: Tv. Lianmuanthang, Secretary, CKKP

**Business Manager** : Pu Langlalthamuan  
TPC Office D. Phailian  
P.O. Box 107 CCPur-795128 Manipur  
Phone No. +91 9089623251  
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

### A SUNGAH THU UMTE

1. EDITORIAL	01
2. KOCHUAM HUANG	02
3. MISSIONARY DAY LEH TANGPHAI KOCHUAM	04
4. CHANCHINPHA DAWI UM CHIAJEL IN	09
5. THAGAU THIANGTHO APAT HALTHAKNA	13
6. KHANGLAITE LEH REVIVAL	17
7. MYANMAR GAMTHAK NASEPNA REPORT	23
8. <b>SERMON</b>	
a) Pathian in a nawp dan dan in a bawl hi	26
b) Mi hampaha a hui	28
c) Lungawina	32
9. KNP HUANG	35
10. KKP HUANG	36

### PUIPATE

Moderator : Rev. Kamkhotinthang Neihisial  
Secretaries : Rev. Thanglianlal (Sr.)  
: Rev. Andrew LR Khiangte (Jr.)  
Finance Officer : Rev. S. Khaikhawlam  
Statistician : Upa S. Thongzalal  
Executive Secretary : Rev. S. Lama Vaiphei  
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



## Pauchapna Thupi:

1. Bial Kikhawmpi lawting tak ah i matchai thei ziak un kipakthu gen hitiu.
2. Kochuam Nibîkte (Missionary Day leh Pentecost Day) Kochuamte'n Taksa leh Thagau ah malsawmna tamtak tawh i mat chiat theina ding un pauchap hitiu.
3. Rostad Memorial High School ah Zillaite leh Zilfîtu zosiate â ding in pauchap hitiu.
4. Gamsung buaina ziak ah panlatu pawl chuam chuam ah puitute â ding in pauchap hitiu.

## MISSIONARY DAY

Simtu zosia Missionary Day chibai. May ni 7, 1910 kum a chun Mizoram ah kipat missionary masapente khan Manipur a hung lut ui. Manipur government inle ei pawmpi in Holiday list ah pansak a la hi tai. Zia chanchinpha hunglutna ding ah tuikai pawimaw tak chu i puteu Pu Thangkai leh Pu Lungpau kha a hui.

Kum 114 a liam ta, chanchinpha chun Manipur sunggil lam a zen zo nai pua, thingtang mite i chennau gam tiang tiang chu a luadim ta a hi. I puteu kha chu tuikai hawitak chu a hi ngei mai ua, i sungkuan kim un Pathian gam ah ei lutpi uh a hi.

Eimau a pat a luan sawnkitna tuikai hi fello a diam ahiloleh, a tui luanna lam ah mite ngaw ding a diam Manipur sunggil lam ahin chanchinpha hin mun a changzo mama lo a hi. Khristian ah i siam thei sun sun teu haw kha Meitei lak ah nam niam, kuama hiatphaklote a hi tangpi ui. Nam lian leh khangtote a hung kipan ua, tuhin Meitei lak ah gingtu i neisun sun teu kha i chang zolo lam uh a hi tai.

Mizoram Synod Ramthar nasepna ah Mashi Sangati tileh Vai changkang Ministry kiti te haw hi ei unle i ettawn uh ngai ding a hi. Tangphai Kochuam nuai a hin namdang te Kochuam a kikhai thei ding a pawimaw ah, chuleh Nam changkang lak ah Pathian nasem ding pawl i din uh ngai ding in ka mui. A chutilo ahileh i gamlaksa sun sun uhle ki ch an zel ding gual in a lang hi.

Anngawl ah pauchap ah theitawp sua ding ahia, zia ban deu a chun lungthim gilzaw ah nasep ding dan gel kawm ah pan i lak uh ngai ding a hi.

---



## **Kochuam Huang**

### **Kochuam Ni Pawimawte**

Kochuam Ni pawimaw (Maundy Thursday, Good Friday, Easter Sunday)-te Pathian umpina zâl in Kochuam tinte'n i lemchang dan chiatu'n i mangzo theiua, kipak um ma ma hi. Zia hun sungte ah hin Office lam ah Hotu- Consultant leh Executive Secretary-te le Kochuam chuam chuam in kikhawpna hun lawting tak in, a nuai ah kitaklang gual 'hin a va mang theiu'i.

#### **Consultant -**

##### ***Maundy Thursday :***

Moulvaiphei (*Tuithaphai*)

##### ***Good Friday :***

Nazareth Kochuam, Lamka Bial

##### ***Easter Sunday :***

Jubilee Kochuam, D.Phailian Bial

#### **Executive Secretary -**

##### ***Maundy Thursday :***

Lingsiphai Kochuam,  
Mata Bial

##### ***Good Friday (Zingkal) :***

Lamka Kochuam, Lamka Bial

##### ***Good Friday (Nitak) :***

Jubilee Kochuam,  
D. Phailian Bial

##### ***Easter Sunday :***

Headquarter Veng  
Kochuam, Lamka Bial

### **Sumtukphai kochuamte vena**

April 7, 2024 (Pathianni) ah khan Office ah Puitute'n Sumtukphai Kochuamte vena nei in Rev. P.B. Zosaphara, Consultant in Zingkal Biakna Kikhawp hun in Thugenna hun a mang ah, Sunnung Biakna Kikhawp ah Rev. S. Lama Vaiphei, Executive Secretary in Thugenna hun a mang hi. Kochuam vena Programme ahin Synod Choir te'n zui in Pathian chawihawina La a sa theiu'i.

### **S. Munnuam ah Biak-In mun ding**

S. Munnuam Pastor *Bial Standing Committee in Bial sung ah Kochuam mi a punbe dungzui ah Branch Church khat dindaw pha a sa*, a mun chawk piak ding ah dawtna a siam gualu'n S. Munnuam khua huapsung ah Biak-In mun ding gam Plot 4 chawk a hi.

## HINNA VÂK

### **Pastor Bial Kikhawmpi**

April 26-28, 2024 sung in Pastor Bial Kikhawmpi Pathian kithuapina tawh Bial tinte'n malzawlna tamtak tawh i mat chiatu kinep a um hi. Panglian Bialtu Pastor Rev. Thangneipau hi taksa damlona ziak ah ki-enkawl zing a hi ziak in, Officers Meeting chun Rev. S. Lama Vaiphei, Executive Secretary chu Panglian Pastor Bial Kikhawmpi matpi ding in a guat hi. Rev. Thangneipau Vaiphei, a ki-etkawlna ah kipat a hung damdaw vak theina ding in Kochuamte'n i pauchapnau in delzui hitiu.

### **Kochuam Ni Pawimaw**

May thasung ah Kochuam Ni Pawimaw (Missionary Day, Pentecost Ni) -te hi Kochuamte'n taksa leh thagau

ah lawting tak ah i mat chiat thei dingu i kidawisak ah, Pentecost Ni hi kumsin ah i lah bawl zing gualu'n PCI General Assembly Pauchapgualna thupi mang ah pauchapgualna leh Pentecost Sermon thupi mang ah kikhawpna um ding a hi. Zia hun ah thilpiak kilakhawmte chu NEICC thawlawm a hi dungzui in, Kochuam tinte'n Bial Treasurer haw malam in Office ah piaklut ding a hi kha i hiat chiatu i kinem hi.

### **PCI General Assembly**

May 1-5, 2024 sung ahin PCI General Assembly, Chaltlang Kochuam Biak-In, Aizawl ah um ding a hia, zia ding ah chun i Pastorte chia sau sau ding a hui ah, Kochuamte'n pauchapna delzui leuhin pha'na.

---

**Nam tin lak ah a lopina leh, mitin lak ah a thil  
lamdang bawlte chu, puangjak tau in.**

**~1 Khangthu 16:24**

---

# “MISSIONARY DAY LEH TANGPHAI KOCHUAM”

~ Rev K. Jama Vaiphei  
S. Munnuam

*“...kichamna chanchinpha gen ding ah, thangko ding ah muat leh tangte chung ah, hung kalsuante chu a mêl uh a pha na e!”  
Isai 52:7(b)*

**K**umsin leh May 7 hin Missionary Day i mang sek ua, Pathian in a chanchinpha eimusak dante i gen sek ua, kipakthu le a ma kiang in i gen sek ui. Sawt deu lai ah khan Kochuam khenkhat in Missionary thawlawm kuanna’n a mang ua, nitak leh a kikhawm sek ui. Tulai in a ni gun ah (Zingkal leh Nitak) ah kikhawm a um lai un, ei uh Kochuam bîk hin Nitak Kikhawpna bep in hun bangchan a hem a pat khan i mang tau a, zia hi le leutheu nakhat ahia, ngaitua thak ding ah pha khat a hi.

Missionary Day matna leh Kochuam chanchin, Pathian thu hung lut pat dan haw i gen tak ua leh i ngaibuai sek ua kilang khenkhat a um sek a :

- 1) Rev. Thangkai leh Rev. Lungpau Pathian awi masa ahi itiu ua, khenkhat in Rev. Dr. Rochung pa Rev. Chawnga lawi a hi ti pawl le a um ui atiu a tite.
- 2) Ei un May 7 in i mang ua, ICI te’n February 5 in a mang zel ua, bang ti dan a hem ti leh
- 3) Rev. Thangkai leh Rev. Lungpau Pathian awi masapen ahiu leh amau February tha Baptisma chang ahiu iti kit ua May tha Missionary Day i mang kit ua tite a hi.

## HINNA VÂK

Rev. Thangkai leh Rev. Lungpau te'n Aizawl ah pat Saptangval 1910 February 5 in a hun puilut ua, zia ni chu ICI lam te'n Missionary Day ah a mat niu chu a hi. Ei hawn le i nawp ua leh matthei a hi. Senvon leh a kimvel khua khenkhat a fang vel ua, Aizawl ah a skul kaina lam ua a kilekit lam ua Vervek ah Baptisma a chang ua, February 13/17 ti gendan chuam chuam um ma leh Senvon a hung phak masak zawk hun uh February tha a hi tina a hi.

Zia nung a chun, Saptangval in Senvon a hung zinna chanchin leh a Hausapa Pu Kamkhawlung Singson kihawn dan leh amau khua le zilna skul hawn sak di a phasak thu haw a gen a, Missionary-te lawiupa Rev. D.E. Jones-te, Dr. Frazer-te'n le lemsakpi in Pu Thangkai te, Lungpau te sang ah lekha zil masate haw lak ah Senvon ah skul hawng ah Missionary Teacher ah kuan ding a hawl ua leh Pute Savawma, Vanzika leh Thangchingpuia @ Taitea te chengthum a hung kipiau

a, ziate leh Saptangval leh a nungzuiteu chu May 7, 1910 in Senvon a hung tung kit ua (*a nivei na'n*) zia Missionary Teacher pathum i gam ua umden ding a hung kuante hung tun ni May 7, 1910 chu NEIGM (masang ah Thado-Kuki Pioneer Mission ala kiti) tu ECCI iti kit tak uh nuai ah um zosia'n Missionary Day ah kimang a hi.

Chun, zia tangval pathumte chun Senvon in skul a hun pan ua, a skul naupang masateu Pu Chawnga lawi in Pathian a hun awi kit ua, Missionary te'n Manipur ah na a hung sep nung ua Pathian awi masa chu a hi ngei ua, Rev. Thangkai leh Rev. Lungpau te chun Manipur ah skul a um ma Aizawl ah lekha a sim lai ua a awi uh a hi tâk zia ah chu a masapen mizosia'n a tina zia uh chu a hi. Amau in Missionary-te Manipur a hun puilut uh a hi chu.

Missionary te'n Manipur ah na a hung sep nung ua gingtu hite leh Missionary te'n a hung sepmau ah gingtu hite

(Baptisma) changtate chu a kibatlo dan i hiatchian uh ngai a hi.

I nam leh kochuam masate khale Thagau mangthai vei i la hiu a, Pathian i awi suak mau in ei leh ei i ki vei ua, Pathian awilo tamna deu ah ala hiat uh Mualkui khua sawlchak ding in Famta Evan. Pauzasawi (Senpu), Upa G.T. Zuana te Pa sawl in ala um a, Famta Rev. V.S. Liankhawpau la phuak tamtak laka *“Hun kipak um leh Hukdamna Ni”* ti leh *“I umsung khawvel ah a Hinna thupha hi chawi in gamtin a”* tite bang hi Thagau mangthai veina La mama a hi. Kochuam in Missions Dept. chuam i nei mau inle Hill-Town kochuam in Meitei pakhat Missionary a la chawm ua, Lingsiphai leh Mata lam ah lawiupa khenkhat tenle a vengsung ua Meitei chengte a la vei mama ua, Lingsiphai-Mata Gamthim Board a la tiu a, a vainung lam in Missionary Fellowship of Manipur ti a hung hia, kochuam in Missions Dept. chuam a hun nei phat in MFM Committee Member tele

Missions Committee masapen (Missionary Board) in a pang den ua, zia department ah Fulltime Secretary masapen chu (Late) Rev. P. Kapa Vaiphei, tu ah Kawlhen Bialtu Pastor Rev. Khaisonthang te pa kha ahia, Shillong ah i Senior Pastor uh Rev. H. Paukhawkai khi Missions Promoter ala hia, amau haw leh lawiupa masa dang khenkhat ei dampi talo leh a dam nalaite malatna Jonai Field haw khi i la pat uh a hi. Sub. M. Kampu (*Upa T. Mangate Pa*) bang le Nepali lak ala vei ma ma, ala kuandawk a hi. Rev. P.K. Lianmang in Chera Theological College (*tu ah John Roberts Theological Seminary*) ah ala kaikhawk laitak in Arunachal Pradesh mite'n sukgentheina a tuak vanglai tak un a Bible zillai nusia in Arunachal ah Missionary din ala kipia a hi. Zia chun lawk zaw ah nasep didan hun ngaitua in Arunachal leh Assam kigamgi chin ah khua um Arunachalte â ding ah le Rail tunna naipen, Jonai (*Murkong selek le kiti*) ah chun kochuam lawi



## HINNA VÂK

upate tawh kithua in English Medium School, Arunachal-te kaiphak na ding in a hun pan dawk tan. Midang dang le hung kipe zel in Mizoram Synod i zawp tiang ua khan School mun li (4) in - Jonai, Laimekuri, Simenchapory leh Mirem in a la ki hawng tai. Mun nga a la himaleh munkhat pen chu Synod zawp ma'n a la kisunzawm talo a hi. Pali lak ah chun Mirem ah School pen chu mi gam ah bahara kipia kiseum a la hi zia in Synod lawi Upate'n lemchang a saklo zia un mimal khut in piakdaw ala hi tai. Official taka kipiak dawna umlo maleh tuni chan hin Mizoram Synod in Kochuam umsate, School ah semte, Evangelist-te zosia a sawm zawm pek hi.

Tangphai Kochuam mi Mizoram Synod nuai ah sem zawm zel te leh a sepna mun zia gual hi a hi :

1. Mr. Th. Liankhup & Mrs. Nianga/Niangi  
- *Bhairabkunda, Assam*
2. Mr. Kh. Lemthang & Mrs. Lalkrosthangi  
- *Bhairabkunda, Assam*
3. Mr. L.S Suantak & Mrs. Khawldoiting  
- *Jengkha, Karbi Anglong*
4. Mr. Paul Neihzial & Family.  
*Headmaster, Synod Home Mission School, Diplibagh, Lunglei Dist., Mizoram*
5. Mr. Nengthianmuan & Mrs. Hohoi.  
*Headmaster, Home Mission School, Malsuri, Lunglei Dist., Mizoram*
6. Ms. D. Bawinu (Evangelist)  
*Pecharthal, Tripura*
7. Ms. Khawlthiandawi Vaiphei,  
*Mamit Dist., Mizoram*
8. Ms. N. Phahawi Vaiphei (Evangelist Teacher)  
*Lakla Tinsukia, Assam*
9. Mr. T.S. Lianlal (Evangelist Teacher)  
*Rajiv Nagar, Mamit Dist., Mizoram*
10. Mr. Lutlal (Evangelist)  
*Somkong Dhemaji, Assam*
11. Mr. H. Khambiakmuan (Evangelist Teacher)

- Hamren, Karbi Anglong, Assam* ah, Arunachal Pradesh State Secretary semlai le a um ui.
12. Ms. Niangngaivung & Mr. D. Benmuan.  
*Hmawngbu, Lawngtlai Dist., Mizoram* Malai in sapte Mission Field i la hiu a, amau ziaka chanchinpha i dawnnau Missionary Day i mang sek ua tu'n ei uh le midangte lak ah Missionary tamtak i um ua, a pension ta le a um ui. Pathian in i kochuam ei mapui zel intin Mission Field thak thak le i hun nei be zel ua, Missionary thak tamtak le hung um be zel in midangte â ding ah Missionary Day umsak/siamdawktu hung hi zel ngei hitiu!
13. Mr. K. Lulun & Family (Evangelist)  
*Sobricherra, Cachar Dist., Assam*
14. Mr. Genlalsiam (Evangelist)  
*Kalain, Cachar Dist., Assam*
15. Tv. Keneth Lialian Vaiphei,  
*Salem Boarding School, Mamit Dist., Mizoram*
- Ziate ban ahin le i kochuam mi, Rev. Lianminthang leh Mrs. Hoineiniang te nupan Indian Evangelical Mission

***Chanchinpha dawi um chia zel in la gamthim danga saltangte pui din...***

---

## HIATCHIANNA LÛLPEN

Pakna Lâ 8000 val phuaktu, Fanny Crosby (1820-1915) kha Pathian in khawmutheina a piaklo chungchang ah bangti'n a gel em ti a dawtnau a chun, Fanny Crosby chun, "Ka pian til ah ei siamtu kiang ah thil pakhat dawn thei ding hileng, ka dawt di chu mitthumsa pian hi hi'n a. A ziak chu vangam ka tun hun a ka mu masakpen ding chu ka Hukdampa mêl hi ding a hi," ti'n a dawnhu hi.

~ Excerpt : Ramthar May 2022 issue

# “CHANCHINPHA DAWI UM CHIAJEL IN”

~ *Upa Khaikap*

**C**hanchinpha i ti hi bang a hem, bang ziak ah chanchinpha chung kiti a hem ti hi neuca'n vak hilchian masa leu hin ka nuam a hi. Rom 10:9, i sim leh la kam ngei in “Jesu chu Lalpa a hi” ti la phuan daw ah, “mithi lakah kipat Pathian in a kaitho hi” ti la lunggil ah la ginchat chun hukhin hi ding la hi. Zia hin Pathian in a hepina ei â dingah chanchinpha a hitheina ding in Jesu chu i ginchat ua, Lalpa leh hukdampa ahi theina ding in i lak un a hung phuang dok ta. Himaleh, eiman zia chu i pawmla, i ginchatlo chun ei â ding in chanchinpha ahi theidiaklo a hi.

Etsaknadin, keima testimony neukhat vak suklat ka nuam a; ka neulai ah kipat in Pathian hi um ding in ka la gingcha, Pathian thu gen te'n gawtmun a lau um dan leh Pathian thu awilo zosiate chu zia gawtmun meidil a chu kawi ding ahi dan a gen phatu leh ka lau thei ma ma a, jan leh le ka imuthei ngai puai. Zia lai a hin thingtang khua Mualdak, tu ah Henglep constituency ahi ta. Zia chun ka la cheng ua. Zia khua a chun sawlchak

Thongpu (Late Ka pa Thongpu) tu tu ah MLA ala hisek T. T. Haokip Pa, (T. T. Haokip hi kei a ding in ka cousin ahia, ka nuteu unau ahia) a hung a, khawlai in nitak in Pathian thu (open air preaching) ahung nei a, aman a genna a chun eihaw hi Pathian chate ihia, Eden huan ah Evi leh Adam thu awilona ziak in Pathian in Eden huan ah kipat in ala naw dawka, zia suan hung um jel in Pathian i hemil zotau a, Pathian ei siamtu hemil in

setan i la ho zaw tau a, setan dawi zawng in i um ua, thei kawlok i siam un nik i chênsak ua setan i la ho sek ui. Ziaziak chun i pianthak ua Jesu Khrista i ginchak ua, Ama i ho lo uh leh Pathian in gawtmun meidil ah ei pailut ding ahi ti thu a hung gen a. Ka lungthim in tu kipat hin Biak-In hawitak in kai ingka tin, Pathianni le hawitak in chang tang ka kati'n. Kei neulai, ka teirawl lai tiang khan le thitha hona leh thitha na sep a bei nai pua. Khosung ah mi a thi di phat leh ka khawgâl ua kawl thupi tak a um a, zia kawlah chun thithate cheng in khuang leh dak a sai ua, puak in a puak veng vung sek ua, zia phat chu leh mithi khat chu ka khuau ah chun a um tei tei sek hi. Nu leh pate kha thi tha lau in khawmual ah a vokcha itlai uh, uicha, akcha itlaite chawi in kithoi ding in a va kuan sek ua. Thithate kha a va hosek ui. Mualdak khua chun mission skul pawl li (4) chan a hung uma, zia a pat chun Khristian a hung pung jel hi. Pu Lungpau bang le Pathian thu gen in

Maite khua apat in a hung a, a lasak le ka het zing chu "*Lei chung pian ma pat Jesu kei a*" ti kha. Tichun gingu hung pung jel in thitha na sepna le a bei deu deu ta. Zu dawn leh kithawi le hung tawm deu deu in chanchinpha'n malam sawnjel in, mihingte le pilna leh thiamna in masawn zel in a kihung um thei ta a hi.

A hinla, thil khawktak khat chu pilna, hetna haw in khangto ma le'nle setan na sepna mihing lungthim suk buaina hi a bei diak puai. Keima ziang ngeile Pathian ka het nung in lunggel leh manglam tiang in setan in ei chawkbuai zing thei sek a. Himaleh thei kham kham ah lawi leh pai lak in Pathian thu lam in kaki mang zing tho hi.

Lapawl sakna'n leh thugen lasak in ka kimang zing sek hi. Maleh insung khawsak haksatna leh dam theilona'n ei hung tuam a, malam ah kinepna ding him umtheilo khop in ka hung umta. Pathian hile um tak taklo hi'na kati seka. Pathian hi um tak tak

## HINNA VÂK

hileh chu ama kibe zing a, ka pauchap zing a, zia tiang dinmun hin ei um sak pua'na kati sek a hi.

1975 lak vel hi in ka hia, BA two year course ka sim pat lai a hi. Hill-Town ah Khanglai Chairman in ka pang a. Khanglaite'n Chain Prayer ka nei ua, kei kha lawiupa ka hina zal in jan khanglai dak 12-2 a.m. kikal chan pauchap ding in ka um a. Ka lawite mi 3 ka hiu a. Ka huphul mama zianga, phalbi lai kumthak zaw lim ah vawt a vawt ziang, puanâk le a lum hun tak dingle kineizolo. Pathian king in ka kilân a "Aw Pathian, a hing Pathian la hi ah, a um tak tak la hi leh tuzan hi Hill-Town biak-In ah khanglaite'n Chain Prayer nei ding ka hiu a, kei panna ding chu jan lai dak 12-2 a.m. kikal hi ding a hi. Ka damsung in zia hun hi ka imut khatlaw lam ka he kha puai. Hing la hi ah, a um tak tak Pathian la hi chun zia hun lap ding in ei kaitho in," ti in ka pauchap a, ka imu veng veng ta a hi. Jan lai dak 12 a git ma minute 15 ding vel

in pawsal khat ka kiang ah ding in thota, la vaigei tai ti in ka pangche hung beng in ka he. Kin ah kin in ka tho a, ka kisa, ka lauziak in kithing kawm in Biak-In lam in ka tai ta. Biak-In ka tun phat phat in pulpit ma ki sep pai in ka kilân ngal ta. Dakkal ni sung pauchap ding lai kha zingkal devotion ding ah dak 7 hungte kha tawh ka pauchap tau. Ngaidam dawtna leh kipak thugenna'n ka hun ka mang ta a hi.

Zia nung sang chu vangam kailo ding ka launa a beita. Genthei ziak a ka kipak theilo nate haw kha kinepna thak in ei tuam kimvel a. Pathian in ei kawina dan dan ah khan ka lung a awi thei ta a hi. Zia te hung um theina bulpi chu chanchinpha ziak, Pathian in a hepina tuaitheilo i Lal Jesu ziak ah ei haw lak ah a hun phuan daw ziak in a hi.

Chun, a thu tawpna ding ah ka hun gen nawp kit chu a hi leh tuni i thupiu "*Chanchinpha dawi um chia jel in*" ti hi La ah le ka la phuak, a thupi ah ka la

matsa ahia. Zia La ka phuakna ziaak leh a kum hawle khatvei kala gen tai. Hinna Vâk ah sua ding ah Editor in ei la dawt ziaak ah kala zik sa ahita a hi. Zia La a khan a chang thumna “*Aw damna, damna Gospel leng vel inla, kawl kimvel tiang in va leng inla; genthei te limna, vakvaite din In nuam, la pâk gimtui nam tin damna din.*” Zia La a hi ka testimony ka phuandawna bep hilo in, mi

dangte keima gual ah gitlona kol ah ala tâng, setan ziaak ah natna’n ala mat a, kinepna sawn dang neilote ding in, zia chanchinpha hi damna pha, lung muanna leh kipak na bukim a nei kitna ding un, chawllo in chanchinpha hi i namsung leh khawvel muntin in chia jel ta hen ti ka dawina thu ka la phuan dawna a hi.

Simtu zosia Lalpa’n maljawl ta hen

---

### JESU HI BANGKIM A HI

<b>Artist</b>	- A tawngkam chu a thumpen hi (Sla 5:16)
<b>Architect</b>	- A kil ah suang pawimawpen (IPet 2:6)
<b>Astronomer</b>	- Dikna Nisa (Mal 4:2)
<b>Baker</b>	- Vaithum hing (Joh 6:51)
<b>Banker</b>	- Hausakna suidaw guallo (Eph 3:8)
<b>Builder</b>	- Suangphûm a hi (Isa 28:16, Iko 3:11)
<b>Carpenter</b>	- Kawtkhak a hi (Joh 10:9)
<b>Editor</b>	- Chanchinpha kipak-um tak a hi (Luk 2:10)
<b>Electrician</b>	- Khawvel vâk a hi (Joh 8:12)
<b>Farmer</b>	- Bu neitupa a hi (Mat 13:37, Luk 10:2)
<b>Florist</b>	- Phaizawl ah Lily leh Sharon pak a hi (Sla 2:1)
<b>Jeweller</b>	- Suang hing a hi (IPe 2:4)
<b>Lawyer</b>	- Vaihawmtu, genpiaktu a hi (Isa 9:6, IJn 2:1)
<b>Labourer</b>	- Chawldamna petu (Mat 11:28)

~ Excerpt : Agape September 2022 issue

# “THAGAU THIANGTHO APAT HALTHAKNA”

~ Rev. Khaisonthang  
i/c Kawlhen Pastor Bial

**Halthakna umzia:** Halthakna hi a thi gual ah umtate sukhin kitna tawh bang a hi. Jesu Khrista kochuam thi ding gual ah a chauthak phat leh Pathian in a sukhin ah, a sukhal kitna a hi. Revival hi a min kizawipi khenkhat tawh gen khen a ngai ah. **Renewal** ahi leh mimal hinkhua ah thagaulam halthakna tung genna a hia. **Awakening** ahi leh kochuam leh khawtang hinkhua sudanglam khawp ah huap lian halthakna genna ahi deu hi. **Revival** (halthakna) hi chu kochuamte/gingtute lak bîk ah thagaulam hinna thak leh kipumpiakna thak tung genna ahi deu hi.

Halthakna chun sual huatna nasatak leh gitlo simna lungthim ei pia, Jesu Khrista ngaisakna leh ama ngainatna a tunsek hi. Gingtute'n Pathian Thu du-na leh ngainatna liantak a nei ua, chanchinpha henailote kiang ah genlat nawpna lungthim a lian ma ma hi. Melma Setan sukmualpho in a um ah, Pathian ngaina tawh mihing chanpите chung ah hepina liantak a umsek hi.

## **Halthakna thupite :**

Halthakna tepte kham tamtak ala tung ta, zia zosia ahin Pathian thilhitheina lamdang leh chungchuang muthei in a kilang sek hi. Kum 1700 apat George Whitefield, John Wesley te unau leh Jonathan Edwards te nasepna ah England leh America ah “Great Awakening” a ti mai uh halthakna chu khawvel in a hiat halthakna pakhat a hi.

Zia halthakna hin kum 1800 tawplam ah D.L. Moody leh Charles Spurgeon-te hun chan kha a dai hi.

Kum 1904 ah Welsh gam ah Evan Roberts nasepna ah hung kipan “Welsh Revival” le a tiu, khenkhat in “Global Awakening” a ti mai uh chule khawvel pumpi sukha halthakna a hi. Zia halthakna zal ah hin India lam ah eihaw kiang tiang inle chanchinpha a hung puaklut khawlaw tau hi.

Ziahun vel ma ah 1906 kum in America lam ah “Azusa Street Revival” a tiu chu a hung kipan ah, Pentecostalism leh Charismatic Movement i tiu hung kipatna le zia halthakna hi a hi. Billy Graham nasepnate khale halthakna’n a zui sek hi. Zia halthakna te apat hin revival hi chanchinpha puanzakna tawh a kizui dan a muthei hi. Revival hin chanchinpha puanzakna lam ah thatnawpna thak a hin sek ah, langkhat ah chun, revival hi chanchinpha puanzakna ah hung kipan le ahi nuam ma ma hi.

Zia halthaknate ahin mi chuam chuam, a naupang leh upa kibang in sukdanglam in a um u’i. Khenkhat chu migilo tizat um tak tak a hiu ah, khenkhat chu sakhaw mi ma ma le a um u’i. Thagau Thiangtho nasep zal in sukdanglam in a um ua, Pathian mi matchak pawimaw ma ma a hung hi tau hi.

### **Halthakna pawimawna :**

Halthakna tunna mun chu gingtute leh kochuamte lak ah thagaulam ah kiakniamna nasatak leh nungtawlina huaisia umna ahi sek hi. Khawtâng hinkhua ah le gitlona a zalen ah, mihing hinkhua kawng bangkim a thanguai hi. Ziagual mun ah chun halthakna a hung tungsek hi. Halthakna a tun phat leh Thagau Thiangtho in mite lungthim khawvel nawpsakna leh damsung khawsakna ah kibualte chu a la dawk ah, kumtuang limna leh kipakna a musak sek hi. Hukdam hinailote lungthim in hukdamna pawimaw dan a musak ah, gitlona khawk



## HINNA VÂK

dan leh Pathian lungnatna tizat um dante muchian sak in, hukdamna lampi Khrista ah um chu a kawkmuk sek hi. Pathian lunglam bawl ding in mite lungthim ah na a sem ah, jangaina hung luanlutna ding in pauchapnate, thute, sacrament-te ngainatna a siam sek hi.

Halthakna chu Pathian Thagau nasep liau liau leh thil zat chuam ma ma a hia. Ziaziakchun, halthakna umsak ding hi kochuamte mawpuakna a hi pua'i. Himaleh, Bible ah hin halthakna dawn ah pauchapna tamtak i muthei u'i (etsakna'n Sam 85:4-7; Habakkuk 3:2). Halthakna tamtak hi, mihingte'n beidawng tawpkhawk ah Pathian a konau ah hung kipansek le a bang hi. Thagau Thiangtho pawimaw sa ah Pathian kiang ah kitulut ah, gitlo simna tawh eima leh midangte thagaulam dinmun nasatak ah veite apat halthakna hung piang thei a hi. 1904 kum ah Welsh gam ah revival thupitak hung kipat theina kha Evan Roberts pauchapna ziak a ti mai u'i.

Ama lungthim ah Pathian in thu a gen chu puangdawklô theilo in a ki hia, a kochuam uh (Moriah Chapel) ah thugenna hun a dawn ah, a thugen nitak ah chun mi 17 bep a hung kikhawm u'i. Himaleh zia mi 17 te mangcha ah chun Pathian in khawvel pumpi sukha ding halthakna a hung tunsak ta mai a hi.

### **Kochuamte leh halthakna :**

Baptistu Johan Khan Lalpa nasep ding a seppiak pua, Lalpa hungna ding lampi a siampiak mai a hi. Kochuamte'n halthakna a hung tun theina ding in Lalpa lamlian siam leu hin, a huntak ah hung mai ding a hi. Ephesate 4:11-12 ah chun, "Tichun, khenkhatte chu sawlchâk hiding in, khenkhatte chu jawlnei hiding in, khenkhatte chu Pathian thugen ding in, khenkhatte chu kochuam vâk ding leh khenkhatte chu zilsak ah pang ding in thilpiak a pechiat a; mithiangthote chu nasepna matchâk ah thuam bukim ding leh Khrista taksa chu siam piting ah, ginna leh Pathian

chapa hetna lam ah i hung pitin ua, Khrista bukimna tawh kibang ah i hung kipumkhat theina ding un” ti imu’u ah. I Pathian nasepnau ah ginum chiat in, theitawp sua chiat leu hin Kochuam hi hung piting in, Thagau Thiangtho le ilak ua cheng zing ding a hi.

I lungthim teu Thagau Thiangtho pawlna tawh sil thiantho a ngai zing ah, Jesu Khrista vak ah khawsak a ngai

ah, thutak kizilsak leh thilpha bawldan kikawkmua a ngai ah, pauchapna leh Pathian biakna diktak chiapi ah ginna ah kiphudet a ngai hi. Zia zosia chu i bawl zing lai un, Pathian in a jangaina ziak ah a mite pauchapna dawnhu ah, Thagau Thiangtho mang ah a kochuamte thagaulam ah chausete ahung suk hin ah ahung suk halthak kit zel ding hi kochuamte pauchapna ahi zing ziang ding a hi.

---

### I GAM IN A MAMAW

1. Pathian thu awi, Thagau thiangtho ah dim, a paukam, tawidan leh khawhei ah Pathian lau mi a hi ti hiatthei, a nasep ah gin-um, a ma bep a hilai ah le Jesu a ding ah gin-um.
2. Politician gin-um leh Pathian lau mi, politics Pathian nasepna ding ah mang sek, zuau gen ngailo, gawlgukna lalo, dikna kawi thupipen, gam leh nam bitna leh dindawna ding ah theitawpsua.
3. Kochuam Pathian nasemtu, Pathian lau, a umna Kochuam leh a insung diktak ah vaihawm, sawlkar ah hotute diklona gen ngam.
4. Sawlkar nasem, dik tak leh taima tak a nasem sek, mi haksatna ngaisak leh panpi sek.
5. Khristian sungkuan, nu leh pate’n a chate Pathian lau dan a ziltit sek, mite’n Pathian lau a hi ti a hiat ziang thei sungkuan.

~ Excerpt : *Kristian Tlangau March 2022 issue*

---

# “KHANGLAITE LEH REVIVAL”

~ Rev. Lallunglian Vaiphei  
i/c Leijangphai Pastor Bial

**T**u masang deu kum 2019 COVID – 19, khan khawsak dan pangai leh sakhua lam in le nasatak in danglamna a siama, zia bep chule hilo in 2023 May 3, ah kipat Meitei gal a hung kipan kit a, tuni tiang a hin, taksa leh thagau lam in haksatna leh kiakniamna ei tut a hi. Zia gual ah hindan pangai sudanglam thei khawp ah buaina huaisia i tuaku hin Khristian Khanglaite chu taksalam genlo in Thagau lam in nasa tak in kiak niamna a tun a hi. Zia gual ah khanglaite, tunung leh Kochuam, Khawtang leh Insung siamtu leh puitu dingte dinmun niam tak leh thimtak hi siamphat a pawimaw a hi.

Khanglaite dinmun siamphat hi tu nung â ding ah khawvel siamphatna a hi zia in siamphat ding dan chuam chuam le tam ma ma ding in ginchak a um a. Himaleh, Um lo apat um ah ei siam ah tuni tian ah i ma’u puitu Pathian lam nga Ama dawidan ah kisiamphat kitna in a hindaw/siamdaw khêl ah hawi leh pha hi chu um ding in ginchak a um puai. Ziaziak

ah chun, Khanglai Revival, Khanglaite Pathian lam ah kisuk halthakna leh Pathian launa hinkhua nei thak sak kit a pawimaw a hi. Pathian lam ah halthak kitna leh kisuk hat thak kitutna ding a hin pawimaw tam tak um maleh a pawimaw diak ah ngaite bep taklang ding i hui.

## **1. Pathian Hiatzingna:**

Pathian chate, gingtu â ding in nisin hinkhua ah Pathian

hiatzing hi a pawimaw a hi. Pathian thu chun Khanglaite chu a khangdawn hun ua a siamtu Pathian hezing ding in a gen hi (Thugentu 12:1). Khangdawng hun hi mihing hinkhua a lul pen leh pawimaw pen a hia, ei mite chun SANA KHANG a kiti hial a hi. Khangdawn hun hi taksa leh lungthim hatlai, sep leh bawl thil ah le tamtak sep daw thei hun, thu leh La lam ah le hawi leh kitup tak ah panlak thei hun a hi. Zia hun lultak hi mihing in i ngai pawimaw bep hilo in Siamtu Pathian ngai inle a ngai pawimaw'i ti hi Khanglai ten hiatmillo ding a hi. Pathian chun Khanglai nawpna leh thatnawpte chu chen ah nuam tak ah hinkhua mat ei phal piak zinglai in Pathian hezing ding in ei dawi a hi.

Khanglaite'n Pathian hetzing ding ti hi... bang gual a maw? Bang ding a maw? Pathian hezing chu bang a h'em? Ti ngaitua thei tak a hi. Khanglaite'n Pathian hezing ding ti chu Khanglaite hin

Pathian a hemil khau/sek ua a hem? Hilo e! Khanglaite bep hi lo in Gingtute hin Pathian chu i hezing ua i hemil ngai puau. Himaleh, Pathian hiat leh PATHIAN HEZING HINKHUA hin kibatlona liantak a nei a hi. Mihingte hin nisin hinkhua a hin thil chuam chuam i tuak ua i maitua seku a hi. Kipakna thilte, dana thilte, haksat thilte, lau umte,... zia i thil tuak lau umtak a hem kipak um tak a hem, a bang chu hi ziang leh le, thil i hiat zing khat khan ei ma ahin danglamna a siam sek a hi. Kipak mel pua, ngui mel, lauthawng, kiphalam, thawmhau,..zia gual hinkhuate hi i kiang ah um ten eimau a hin mu in, a hia thei sek u a hi. Zia bep chu le hilo in, nek leh dawn ziang ah le danglamna eima ahin a tut sek a hi. Ziagual a chun Khawvel ah i khawsak nau ahin thil bang a hem khat i hetzing ziak in i khawsak dan in danglamna a nei a, selguk thei tiang nei leu hin le eimau ei subuai leh eisu danglam tho tho sek a hi.

## HINNA VÂK

Ziaziak ah chun, Pathian in Khanglaite a khangdawn lai ua a Siamtu hezing ding a ti hin le danglamna a phût a hi ti hiat ding a hi. Pathian hiatzing na chun i nek leh dawn in danglamna tut hen la, i kicheidan ah te, i khawvel chên dan bangkim a hin danglamna a tut ding a hi. Pathian hetzing ziak ah nisin khawsakna bangkim ah danglamna mani taksa ngei a tun a hi chun COVID ahem, MEITEI GAL ahem in boruak leh khawsak dan a lumlet in hung sang danglam ziang leh le Pathian Hezing khanglai chu buai ta puan tin, ama'n kinepna hing a nei bep hilo in, midangte kinepna leh thamuanna petu hi zing thei ding a hi. Pathian hetzingna hinkhua hin Khanglaite'n Pathian gam hung ding zel ding leh khawvel hung chia zel a ding ah i mawpuaknau dawi umtak in supiting thei ding i hiu.

### **2. Thutakna leh Ginumna:**

Tulai ah i gamsung buaina ziak a hin, nek leh chak hawlna

leh sep leh bawl kilawna ding natiang in haksatna i tuak ua. Mi tamtak chu mi vangsiatna leh haksatna chu lemchang ah la in semlo bawlo ah kivak gua hileh kilawm tak ah um tam tak mu ding a hung pung zel ta a hi. Zia gual ah duamna leh nekjukna society ah um leh hung khanglian Khristian Khanglaite hin THUTAK ah hin i mamawu a hi. Nekjukna leh sepgimlo ah nekna Government Scheme chuam chuamte leh sum leh pai bailam tak ah mutheina lampi tamtakte hi tulai i gamsung leh society a hin pangai gual ah ngai ziang a hi ta. Mi tamtakte'n a bawl ziak ua hin pangai a hi ziang puai ti khanglaite hiatsak hi nu leh pate mawpuakna a hi.

Zia gual ah pawlche society a hin Khristian Khanglaite chun Pathian min suang ah Thutakna a hin piu a, tangko pi thak ding a hi. Thutakna leh Ginumna hi Gingtute um ding dan ah Pathian in a guat leh ei phut chu a hi (Mika 6:8; Thupuan 2:10). Jesu'n

ama chu 'Lampi leh thutak leh Hinna' a hi thu a gen a hi (Johan 14:6). Thutak kiti hi bang a hi em? Lal Jesu leh a hukdamna thu hi a hi (Ephesa 1:13). Zia thutak chu hia hukdamna chang a, Khawvel dawidan ah umlo a, Pathian dawi gual leh pawmtak ah hing ding leh mi dangte le zia lampi chu kawkmua ah pui ding in ei dawi a (1 Timothy 2:4; Rom 12:1-2). Ziakiachun, Khanglaite hin Thutakna leh ginumna hi ngai pawimaw thak a ngai tak zet a hi. Zawnei Mika manga Pathian in a mite kiang ah a phut chu DIKTAK AH THIL BAWL a hia, zia chu thutakna leh gin umna panglo in suk pi thei a hi puai. Ziakiachun Khanglai in Pathian dawidan leh ei phut gual ah khawsak theina ding in Thutakna leh Ginumna lam in kisuk hal thak a kimamaw a hi.

### **3. Pathian Ngaisan/Suang:**

Ngaisan ding dik ngaisan lo ziak in Mimal, Insung, Kochuam leh Khawtang in haksatna leh kiakniamna

a tuak khawlaw sek a hi. Ngaisan ding ngai sanglo ah thildang ngai pawimaw leh ngaisang ziak ah i gam leh i khawsaknau bangkim in buaina nasa tak i tuak lai ua hin, Khanglai tunung hun siamtu dingte â ding a hin Pathian Ngaisan/suan, ngai pawimawna lam ah halthakna a pawimaw khawp mai a hi.

Khristian society a hin Pathian ngaisanglo leh suanglo hawl leuhin kuama ki mu lo ding a hi. A hinla, i nisin khawsak dan leh kivaipuakna bangkim hi i thil veng veng a hi chun, mimal hinkhua Pathian Ngaisang pen leh suangpen hinkhua leh ngaisak vaklo hinkhua chu a thil geldan leh vaihawm dante in a hiat thei a hi. Tulai khawvel a hin khanglai â ding in ngaisan ding leh buapi ding a pung hat ma ma ziang ta ziakiachun tunung ah Insung , Kochuam leh Khawtang kingakna ding khanglaite hi ngaisan ding leh suan ding dik Pathian lam ah hal thak a ki mamaw ma ma a hi.

## HINNA VÂK

Meitei gâl lau um lak ah i ngaisan uh chu galdo thei pawsal hangsan leh phate, gal vante, thingtang mite kipumkhatna te, Meitei sang ah i hansen zawk na teu leh a dang dang te a hia. Chuleh, Khristian Pathian hing ho te i hi zia u zotu hi ding ah kinepnate le i nei u a hi. Himaleh, Pathian thu a hin Pathian suang ah Ama kinga-te hinkhua mu ding bang zat hem a um, ziate hindan apat hin zil ding tamtak a um hi. Abraham chun Pathian bep a suan zia in a hinkhua puitu pen leh lian pen chu Pathian thu a hia, ziazia chun a Insung mi, a khua leh tui leh a chi leh nam sang in ziate zosia siamtu Pathian thu mang in Pathian in chawisang in nam lopi tak in a siam a, tuni tiang in Khristian te ginna lam ah ettawn tâk pente lak in a pang zing a hi. Ei u chu a hi leh Pathian ngaisang leh suang hi ngal Khanglai, YVA leh ZILLAI lam ah kipia deu chu Kochuam lam ah lung awilona ding leh phunnawi na ding a

ki hau mai hileh a kilawm hi. Gingtu â ding ah thupi pen chu Pathian a hi ding a hia zia chun kawng bangkim ah ei pui ding a hi.

Ei uh society a hin chu Pathian thu sang ah i ngai pawimaw leh kawim san zawk tam tak a um hi ti chu i kivaihawm dan leh nisin i khawsakdan ua hin a kichian ma ma hi. Tuhun ah i society chu zia gual chu hi ziang leh le khanglaite hi Pathian ngaisanna leh Pathian ah kinga Ama suanpen ah neina lam hi ngai pawimaw ah i kisuk halthak kit ahi chun hun sawllo kal chakhat in Pathian thu ah kipuihuai leh kivaihawm nam Pathian nam i hin chu hung kilang thei ding a hi. Tu hin chu PU LUNGPAU LEH THANGKAI chi leh namte kahiu ti a amau hiat zingna ding bang ahem khat ngaitua hi a pawimaw pen gual in a kilang ta mai phawt chu a hi. Pathian ah kinga Ama suanpen ah neite chu chi leh nam leh khawvel thil chuam chuamte hin a

chawkbuai mai mai ngai puai. Ei uh i hiu leh chu chi leh nam bep hilo in phung leh chang tiang in i buai buai seku a hi. Zia bep chu le hilo in Organization leh Fellowship chuam chuamte kipuihuai sak in Pathian Kochuam hi chu kipawlkhawmna chikhat gual bep ah ngai in, ei puitu leh ei vaihawm khumtu pen in i kawi theilou a hi. I nam ki ngakna pen chu YVA ahem, ZILLAI a hem, VPC a hem a hi mai a, Khristian kingakna pen leh suanpen chu Pathian thu hi ding hileh kilawm tak a hia, Pathian thu hi kingakna lianpen ah mang hileu hin Pathian mite kilawi khawmna KOCHUAM hi ei puitu leh ei vaihawm khumtu pen chu hi ding a hi. Zia hi ahi Khanglaite halthakna ding ah pawimaw chu.

Israelte chu Pathian nam telte a hiu a, zi leh pawsal ah a kinei danu, kinawl dan, kivai hawmna dan chuam chuam- gucha chung thu,

tualthat thu, kingaidamna thu, etc zosia chu Bible ahin mu ding a um a, ziate zosia hung kipatna chu Pathian ahi, a ziak chu Pathian chate a hi ziak un Pathian thu chu amau kivaipuakna leh kivaihawm dan chu a hi a hi. Khristiante hi Pathian chate i kitu a, i Kochuam THUGIN 1-NA, *“Thuthung Lui leh Thuthung Thak bute hi Pathian Thu ahi’n, ziate bep hi ginna leh thilhi thu ah tena diklo theilo chu a hi”* ti a hi. Pathian Thu chu ei puitu leh bangkim ah suanpen leh kingakna i mat theina ding un zia lam a hin halthakna i mamaw mamau a hi. Tunung ah hun hung chia zel a Mimal, Insung, Kochuam , Khawtang leh Nam ah Pathian gingu leh Ama chate i hi nau midangte kiang ah pe sawn a, i khawsaknau kawng bangkim ah Pathian Thu’n vai a hawm theina ding in, tulai Khanglaite hin Pathian ngaisanna leh suanna lam a hin halthakna i mamaw tak zetu a hi.



# “MYANMAR GAMTHAK NASEPNA REPORT”

~ Rev. Thangliansang  
i/c Nanphalong Pastor Bial

**A**masa'n Myanmar Gamthak nasepna report pia thei ding ah hunpha ei pia leh buaina jiaak a thi leh mang tamtak lak ah kochuam mite taksa bitna ei pia Pathian chung in kipakthu ka gen hi.

I la hetsau gual in Myanmar gamsung buaina hi kum 3 val ta a hia, buaina sung ah tuchan in In (house) sing giat val hâlthak in a um a, thi leh mang tamtak a um a, ahi'n, kochuam mi buaina ziaak ah haksat gentheina dang dang kituak maleh thi leh mang umlo in Pathian venbitna a kidawng in a hi. Myanmar gamsung a hin, Tangphai Presbyterian Kochuam Vaiphei pau mang kochuam (4) leh Kalaymyo Area ah Burmese kochuam neu cha cha (3) a leng ah kochuam (7) a um a, zia chu bial 2 ah khen in Tungkyaw Pastor Bial leh

Nanphalong Pastor Bial ti'n khen a hi. Tungkyaw bial ahin kochuam pathum (3) aum a, (a) Tungkyaw (b) Phaijang (c) Gamnuamphai te a hia, Bial Centre Pastor Zuankhawmang umna Tungkyaw khua chu Burma sepia thuaihuaite'n In (20) val ala hal thau a, zia lak a chun Kochuam Chairman Pa Thangkhosoi In le a la pangkhawm in a hi. Khua sung mi chên theina hitalo in, khuasung ah lutte mat leh tha a bawl zing jiaak un khawpi taisan in Manipur gamgi zul ah Tangkhul khua bêl in genthei tak in a khawsau in a hi. Tu dinmun ah Phaijang khua

hih hal thâk hinailo maleh hal ding thu het jiak in lau thawng in Manipur border ah Tangkhul khua a bêl un a hi.

Tungkyaw bial sung a, Gamnuamphai khua bep hi tu tiang dinmun ah a um ngai ah umthei sun a hi. Manipur border ah Tangkhul khua bêl nuamlo khenkhat Tamu khawpi sung ah hung tailut in Inlua in a um ua, khenkhat Baptist leh UPC haw chu ala umsa kochuamte haw bêl in a kipialut ua, Tangphai Presbyterian Kochuam mi sia chu a leng ah In (7) a ting a, Nanphalong Bialtu Pastor Thangliansang in Rev. S. Lama Vaiphei, Executive Secretary hetsak in fellowship min pu'n a enkawl a hi. Christian Church of Myanmar (CCM) Kochuam in a Biak-In uh ei phal piak ua, a kochuam neite Pathian ni 10:00 am ah kikhawm in Tangphai Presbyterian Fellowship te chu 1:00 pm ah kikhawm sek in Pathianni sin leh khatvei gel kikhawpna nei in kithâk a hi.

Kalaymyo Area lam le nasa tak in a buai zing a, Kalaymyo Bial ti kha tuhin i Synod vaihawmna gual in Nanphalong bial ah kaw i hita, Nanphalong bial a chun kochuam pali (4) a um a, ziate chu (a) Nangphalong (Tamu Area, Vaiphei Kochuam) (b) Nansongpuh (c) Kalaymyo (d) Aphuetset te a hui. Burmese kochuam pathum lak ahin, Nansongpuh hi mei ah hal thâk ahia, khua pumpi In 500 val lak ah ei kochuam gingtu In 11 le a leng ah pang vek in, gamlak thingnuai po ah tai jak in a khawsau hi. Aphuetset kuate le mun dang ah zam chavai in a um ua, Kalaymyo hi chu khuasung ah kikap tuana um zing ma leh pawt dawna di mun hechuamlo in a um zing mai un a hi.

Kalaymyo Area sung ahin, Bialtu Pastor, Pastor Thangliansang in chiathei hun sia bial kan sek in a vetha zing a, hun bit ah Missionary Imphal Bial in ala chawp uh Evan Maung Win leh Evan. Khinmayi leh Myanmar

## HINNA VÂK

Tangphai Presbyterian Tamu Area in a chawp uh Miss Tingthianduai te'n Evangelism-chanchinpha hilna a nei zing un a hi. Mimal ah a la holim piu lunglut deute kokhawm in Salvation Camp 2022 December leh 2023 October sung ah nivei mang in, Mi 25 te'n Lal Jesu amau Lal leh hukdampa di'n kisân in amau nawpna ngei ah hung kipialut in, Camp Speaker (cum) bialtu Pastor Rev. Thangliansang in Baptisma a la chansak in a hi. Gambuaina kal a le, gasua thei ah ei pui i Pathian leh Camp sponsored hun bawlte chung in le kipakthu i gen ui.

Myanmar gamsung buaina hi thawveng lam panlo in buai lam manaw jel dinmun in a um zing hi Sepai Government in khanglai Pawsal kum 18 a pat kum 35 kikal mi leh Numei kum 18 a pat 27 kikal mi sepai di'n khuatin ah chawm (dawl) di ti thu chiapi in mun khenkhat ah pat ahi ta, khanglai tamtak In ah um ngam talo in kikhawm

thei nalai kochuam haw a le khanglai mu di a um tapua, siatni phatni a le haksatna ka tuak zing un a hi.

Gamsung buai jiaak a, nek leh dawn hawlna leh kochuam malâkna kawng bangkim ah haksatna a kituak chiat in a hi. Chenna khua lua thei taklo ziaak a, galzamte a kochuam uh bul lamte'n vena relief leh ration-te hawm in mani kochuam chiat kienkawl in a um ua, Member khenkhat a pat report a hun bawl phat uh leh puitu hina lungthim a suh kha ma ma sek in a hi. Bang chu hitaleh kâwl leh phai ah buaina maitua zing i hi lai un taksa leh thagau ah himna i chan zing theina din pauchapna'n lei hun het zui diu in dawtna le ka hun nei a haksat tuakna neu cha cha le ka hun sulang in a hi. Lalpa'n kâwl leh phai ah a kochuamte ei umpi zing hen la, buaina zo ah hunpha mukit ah a ma ding ah ga tamzaw suathe i di'n a kochuamte ei maljawl ta hen.

# “PATHIAN IN A NAWP DAN DAN IN A BAWL HI”

~ *Upa Ginkhanpau*  
*New Lamka Kochuam*

biak uh Pathian hi hat chungchuang, Pathiante Pathian ahia  
Ama chung ah thunei ding kuama umtalo(sovareign)ahia Van  
leh lei chung ah a thilsiamsate chung in a nawp dan dan in  
thil a bawl sek dan hi Bible a mu in a um hi. Mihingte chung  
in a nawp dan dan leh pha a ti dan dan in a bawl sek hi. Zia  
chungchang hi mawl tak leh chawmkim in vak ngaitua khawm  
hitu.

Jeremiah 32:27 na in  
Pathian in, *“Ngai in, keima  
Lalpa hi, mihing zosiate  
Pathian chu ka hi, kei â ding  
in a haksa talua bang a um  
em?”* ati a hi. Pathian chu Ama  
hiate leh helote Pathian ahia,  
Ama gingchalo leh dodaltute  
Pathian ahia, a chung un a  
nawp nawp a bawl thei, a  
chung un thu a nei a, a thu  
thu’n thil a bawlkhum thei  
hi. A gawmkhawm thei pen  
in, Pathian in a thilsiam sa te  
chung in thu a nei ah pha ati

dan dan in a chung un thil a  
bawl sek hi.

Thuthung Lui hun lai ah  
Leng lopi tak Nebukkadnezar  
kha le Pathian lopina pelo  
a chapo tak ah a pau daw  
ziak in Pathian in nasatak  
in a kawi niam ah ganचा  
gual in a khawsak sak a hi.  
Pathian lopina a piak phat in  
Pathian in a tung ding kit ta  
ahi (Dan.4:35). Pathian in a  
thiltup sukbutinna ding in a  
nawp nawp a mangcha thei

## HINNA VÂK

hi. Syria Lengpa Cyrus kha Israel-te a sal tannau a pat zalen sak ding in a mangcha a hi. Khawvel gam chuam chuam leh nam chuamte luchang (Leader) haw leh Vaihawmtute haw hile Pathian guat/pha a sak ahiu. Aman pha asa Vaihawmtu ah pang thei ahiu. A nawp nawp a dawmsang a, a nawp nawp a kawi niam thei a hi.

Mihingte ngaidan ah kilawmlo leh hiding dawl ah a kawilo thil tamtak Pathian in a bawl sek a, kuama'n a khut a tutang thei pua, bang atia zia gual a chu la bawl ahem le ati thei diak puau. Pathian a hung kipat phat leh pathian dangte a thip chil chel mai u a hi. Sepai hawnte Lalpa ma ang ah ding zo pathian hat a um puai. Vannuai khawvel ahin Pathian hiatlo ah thil tung him him a um puai. Thil hung tung ding leh thil um nailo hung um ding le mulâwklo a nei puai. Lalpa Jesu'n Pharisaite leh Ama nialkaltute lunggel a helet

thei hi. Bang a suang tuau a, a ngaituau em ti a hechian ma mai. A nungzuite lak ah suan um ma ma Peter in a phatsan ding le a mu lawk a hiziak in a khâm tang diak puai. Juda Iskariot inle phatsan ah galte a matsak ding ahi ti le ahia'i hilele a guitun sak tho tho a hi. A guitun ding pha a sa a guitun sak mai a hi.

Pathian gen ding hilo leh kilawm tak, 'Jacob ka hepi in Esau ka hua ahi ati. Jacob leh Esau te chanchin hile mak tak khat a hi. Pathian in zia gual ah chu um ding ah pha asa, a gen lawk ah a guitun sak a hi.

Ei uh gingtute, A thisan mantam tak ah ei tatsate hinkhua ahinle i hiatthiamlo leh i pawmtheilo thil a hung tung sek ah, Pathian in i tuak ding ah pha a sa tung ahi ti i pawm thiam a kiphamaw hi. Pathian in i tuak ding pha asa a tunsak ahi mai a hi. Aman a nawp dan dan leh pha a sak dan ah a bawl a hi.

## “MI HAMPHA A HIU ” (Matthai 5:3)

~ *Upa Thualkhawlian*  
*Hill-Town Kochuam*

*“Thagau ah tasam ahi lam kihete chu mi hampfa a hiu, vangam chu amau â ahi ngal a.”*

Lal Jesu’n tâng chung, a thugente lak ah hin chang khat bep i taklang hi..”Hampfa” ti thumal hi “Vangpha” ti a le genthei ina. Zia Bible chang hi ‘Thuthung thak suak masa’ khan *“Lungthim ah gentheite chu a vangphau; vangam amau a ahi ngal a”* tia kizik a hia, *“Thagau ah tasam ahi lam kihete”* a ti hin a genchian ba’n ah hiatthiam le a bailam ma ma hi in a kilang hi.

Sakhaw dang hote lak ah India nam Pa ti a kigen Mahatma Gandhi khanle pha sa ma ma hiding ahia, a pauchap di phât leh a sim sek a tiu. Chuleh, Juda zilsaktu te’n le thu pawimaw a gen phât ualeh kichu masa zet in thu a gen ui, a tiu hi. Tâng chung ah a thu gen ah khanle i Bible gen dan in “a kichut zaw phat in” tî’n a kizik khel khel hi.

**Hampfa/Vângpha** : Zia khawvel a hin hisel leh tâksap neilo in i um le ahi maithei. Himaleh Jesu’n ei thu vaithâk chu Thagau ah tasam ahi lam kihete bep in vângam lua ding a hi thu a gen hi. Zia thu hi thinung thagau gam i tun hun bep â ding ah a gen ei puai. Khawvel damsung ngei ah mat ngal ding ah thu vaithâk a hi. Jesu khawvel ah a lenlai

## HINNA VÂK

khan chunglam thagau gam in a mission a pan pua, lei gam i chenna kipat mat pat ngal ding in ei zilsak hi.

**Sawlchak Paul** : Jerusalem khua ah Juda Rabbi(thiampu) minthang Gamaliel kengbul a selian, Rom khua leh tui (*citizenship*) hina nei, a Grik min Paul a hi. Tisa gam ah chun kisanpi kham hina (*title*) nei hiziang maleh Khrista a hun mu phât in a ginna ziak in sukgentheina zât chuam chuam a thuak a *“langkhat langkhat in haksatna, suklungzîn in ka um un, ka lungkia diak puau hi”*(2 Kor 4:8) a ti a hi. A lei taksa dengdel dan a hechian a, kisanpi kham um in a he puai. A damsung kum le 70/80 khêl hilo ding ti a he (Sam90:10). Ziakiachun, *“Zia thilhitheina chungnung chu keimau â hilo in Pathian â ahi ti a kilat theina ding in zia go chu leibel ah ka kawi tau ahi”* (2Kor. 4:7) zia thu hi hiti hin vak gen hitiu, Khrista keimau ah um chu thasuak talo ding

in ka lei taksau sunggil lam in zia go lultak chu ka vop chak tinten tau hi, ti’n vak gen leu hin kichian diak ding in i gingcha a hi. Khrista tilo kisanpi ding thil dang um in a he puau hi.

**Leng Solomon** : Bethsebi lak a David chapa 2-na ahia, Israel te leng 4-na a hi (964-922BC) min dang a nei a zia chu Judia a hi. Solomon minthanna pe’n chu a hausak leh a pilna (*a vaihawm thiamna*) kha a hi. Israelte hun ah lei go lam ah thupina sângpe’n a chan hun uh a hi. A hausakna bulpi chu sumkawlveina lam ah leng Hiran tawh kizopna hawitak a nei ziaku kha a hi.

Ziagual tuk a hausa minthang dinmun sâng, mipil leh thilhithei khan, a hun nunung lam in bang a hun gen tam? *“Ni nuai ah (khawvel ah) thil kibawl zosia hi ka mu ta’n, ahi, en in, a leng in bangmalo mai leh hui zang mat gua tawbang bep ahi zawi”* (Thugentu 1:14) a ti a hi. Khawvel in hampaha

a tite hi Jesu'n hampaha a ti puai. A titlo dân Pathian ah kipat kihedaw theilote chun a hinkhuau ah a dangchâknau a paitha thei tak tak puau. Lal Jesu'n *"ka kiang ah hung un keima'n a la chawldam sak ing ka"*(Mat.11:28) a tina mun tiang a tung zo sek puau ah a hi.

**Lopina nûtsia lo :** Lal Jesu'n khawvel a nutsia kuan tiang khan le, a sep maba'n sunzawm ding, a hepi ma ma te kiang khan sum leh pai In leh lo, dinmun lopi tak tak a nutsia malam puai. Kûl sa hileh nutsia ma ma ina. *"A gam leh a dikna chu hawl masa tau in; tichun zia thil zosia chu piak belap in um in lau"* (Mat 6:33) a ti zaw a hi.

**A nutsia te :** *"Thamuanna ka nutsia la hiu, keima thamuanna ngei chu, khawvel in a piak gual in ka hun pia puai, la lungthim uh lungkham kiu hen, lau le lau ki hen"* (Johan14:27) *"Ngai un kei kum khua'n khawvel tawp*

*tiang in la kiang un um zing ding ka hi"* (Mat.28:20) ti'n a thamuan hi. Go thil a châng tel pêen ei puai.

**Chapa taimang :** *"He pa,vân ah mi chung leh nangma mit mu in thil ka hikhial tai, la chapa tâk le ka hi ta puai"* (Lk 15:21) titu khan a ginna lam ah *"chapa taimang"* ahi dân a ki hechian a, a kisikna leh a kikhiak niamna lunggil a pa'n a mu phât in, a pa lunggil a sun kêk ta. Migilo a Nun sim ah hung kile kît a ding in itchak a nei ta puai.Mi kuale a bukimlo dan, a tit zawlo dan, ginna lam ah a hatlo dan thagau ah kihechiantu chun khawvel thangai ding dan tiang zil thiam kawm in a khawvel hinkhua a mang thiam sek hi.

**Leng David :** *"Israel phung zosia mi bangzat a hiu em ti ka hiat theina ding in va sim un"* ti'n zawlnei Joab leh a sipai te a sawl a. Joab dawnhuna *"Lalpa la Pathian in ka lengpa mitmu ngei ngei ah hinle, mipi*



## HINNA VÂK

*te hi a le za in a supung hi ti la mu ngal in! Bangziaka lengpa chun zia gual bawl ding ah chu hung kithalawp ziang la hi em”* (2 samuel 24:3) Joab kiang ah Lalpa thu hiatsak (i) Kum thum kial tunsak ding (ii) Galte’n a hun del ua tha thum sung taimang (iii) La gam sung ah ni thum sung natpi(hipi) lensak. Khawi zawk la têt diam? Natpi a têt a, hun tiam sung in mi sing sagi (70,000) hial a thi tau hi. Mipi a sim kha Pathian in a pawngpaw zakda hilo in lunggil lam ah chapona, hi kisakna khan Na a sep ziaka Pathian in a zakda tinten a hi.

**Leng Saul :** Israelte Aigupta kipat Canaan gam zuan ah a hung pawt ua khan Amalek lengpa’n a la do hi. Saul leng ah a pan ah khan Pathian in Amalek-te do ding in a sawl a. A va do ngei a, Lalpa hatna zia in zawna a chang hi.

Lalpa thu piak *“Khat chale hawilo ah tha chimik sik sek di”* ti himaleh Amalek leng

Agag a hing hawi a, gangual a pian pha pha Lalpa maicham halmang kithawina lat ding in a hun kipui hi. Lalpa a lungkim ta pua leng a hina kipat in a pai ta a hi (1 Samuel15:10)

Lalpa thupiak zui kim nuam lo, a ma dawidan ah chia, kikhiak niamna leh thu matna panglo, chapona lungthim a put zia leh ama hekna pang lo ah, Amalekte gangual ah halmang kithawina lat gua. Ziate zia ah chun Israel phung zosiate Leng hial ah pang ding in Lalpa’n tingzo a sa ta lo a hi.

Kochuam sung a hinle i Bible châng têt uh hi a matna ding mun tak a, mat thiam kûl ma ma ding dan a hi. Mimal ngaidan chiapi takluatna a um khak di kiveng zing in, tawmna nun ah lunggualna tunsaktu pan hi Lalpa lunglam a hi. Jesu’n Simon Peter kiang in “lau kin tukhel chu (sanga man lo in) mihing man ta ding la hi” (Lk 5:10) a ti kha he thak kit zel hi tiu.

## “LUNGAWINA” (Hebraite 13:5-8)

~ Pi Chinglalven  
Lamka Kochuam

I hinkhuau ah chawldamna tak tak mulo tamtak i um dingka gingcha, thil pawimaw tak bawl ding nei zia ahte, exam result ngak zia ahte, zing ah sepding pawimaw nei zia ahte, thil chuam chuam zia ahte ah lungthim chawldamna umlo in i um sek u a hi. I lungthim suangtuanateu zia in a tak ah hung tung pen khale mutheilo in i um sek ahi kha. Kum tamtak chiata ah Saint Augustine chun *“Pathian i mulo chun lungthim chawldamna a kimu puai”* ati hi tuchan inle a dik zing nalai a ahinla thumanlo thilte ah chun i kisubuai zing sek u a hi. Tha bangzat a h'em chiata apat chun i gamsung uh buainate zia in thina leh lungngainate hin ei chum ah, nei leh go ch'an tamtak le i um u a hi, zia lungkhamna leh buaina i tuakteu apat hin zia leichung hi i kualzinna gam ahi ti ei muchian sak in ei hiatchian sak diak a hi.

Jesu chun *“Chingthei un!... nei leh lam leh thil hauna mai hi mihing dampi pen ahi puai”* atia (Luka 12:15). Ahinla mihing ngaituana ah chawldam theilona i nei zia kun zia hi a dik in i pawm thei sek puau a, Jesu ginchatna leh taksanna neizing pum in thiamna, hiatna leh hun i neite ua hin khawvel

hausakna thilte ahin i buai zaw seku a hi. Khawvel nei leh go te ahin ka buaipuai i ti sek vangun i lungthim ahin zia nei leh go thilten i ngaituanateu a lua zing sek a hi. Hebraite lekthawt ziktu chun êna panglo in leh i nei dan dan ua lungawi ding tia ei tilkho a hi (Heb 13:5)

## HINNA VÂK

Pathian in chawldam theilona leh lungawi theilona hi ei piak mawng hiding in la gingcha' u em? Pathian in ama kiang bep ah lungawina bukim um ahi ti i hiatchian na ding ua thildang ah lungawi theilona ei pe zaw a hi. Pathian chu i lunggul deu deu ding, pauchap tam ding, thiangtho leh thutak zing ding, mite ngainat zawk sem ding, pilna tawh jangaina neitak ah nitin hinkhua mat ding tite hi lungawina chite lak ah khenkhat te chu a hi.

A haksa pen chu kinepna umtalo lungawilona ah chun lungawidan i kizil dingu hi a hi. Etsakna'n i van neite, i nek hawlna, i Kochuam, i sungkuan leh a dang dang. Ziate haw hi Pathian in ei a ding ah ei siampiak leh ei guatpiakte chu a hi, ziaziak a chun i chante ah lungawidan i kizil ding uh a hi. I lungawilo ahi chun Pathian kiangah *"la malsawmna ka dawnte ah ka lung a awi puai thildang a pha zaw ei pia'n"* tina tawh kibang a hi.

Ahile, i hinkhuau ah lungawina chî bangti tu ding ahi diam? Sawlchak Paul in

Philippi-te kiangah lekha a thawtna ah chun *"...ka nei taphawt chung ah lungawi tak ah umdan ka thiam ta ngal a. Tawmcha bep nei dan ka he ta'n, tamtak nei dan le ka he tai..."* (Philippi 4:11,12) ati. Paul gual ah eite hinle thil bangkim i tuak leh i nei ahin lungawidan i kizil thei ding uh a hi.

Ahi, a thupi pen chu Paul in ei hil gual in, Pathian hepina leh Pathian muanna chu lungkimna bukim a hi. Khawvel hausakna leh nawpnate a hin lungawina bukim ei pia theilo a hi, Pathian tawh i kâl ei susiatu le a hi. Ahinla Pathian muang ah i lungthim zosia ama i hawl ahi chun lungawina bukim kinei ding a hi.

Lungawina bukim i chan theina ding ah chun haksatna tampi kituak ngei ina, i chân dingle tampi um ding a hi. Ahinla i sep leh bawlte ahin kipakna leh lungawina i mu em tia eima ki dawt zing a ngai a, Jesu Khrist ah chun kipakna tak tak a um hi ti hi i hiatzing uh a ngai hi.

Lungawi theina ding ah chun kipak zing hi a pawimaw a hi. Sawlchak Paul lekhathawt ah chun *“Bangkim in kipak thu gen zing un”* (I Thess 5: 18) ati a hi. I chan leh i tuakte ah lungawina i nei chun kipakna bukim i neithe i a, Pathian malsawmna i dawnte khale i muthei a hi.

Kisumthei tak leh kithunun tak ah hinkhua mat hi haksa sek maleh Pathian tawh i kizawp matna ding ah chun thupukna haksa tak lâh a kûl leh a pawimaw hun a tam ma ma hi. Khawvel hausakna leh

nawpnate taisan ah Pathian dawidan lampite zui ding ah i kisak lai a chun thepna tamtak i tuak ding mawngu ahi ahinla kisumthei tak leh kithunun tak ah i um ahi chun thepna in ei zolo ding ahi Pathian tawh i kâl le det ding a hi.

Lungawilo tak ah chantawk ah lungkim dan helo ah hinkhua haksa tak mat sang in chantawk ah lungawi dan kizil ah lungkim tak ah Pathian muan ngamna tawh kipak thu gen zing kawm ah hinkhua mat theina hi eima thu a hi. Nang in bang la têt diam?

---

### TULAI GANCHA MAN

1. Bangkawl - Rs. 70,000/-
2. Bawng - Rs. 60,000/-
3. Kelcha - Rs. 10,000/-
4. Uicha - Rs. 3000

Chun,

Election lai ah mi pakhat man Rs. 500-1000/-

Kingaitua in, Rs. 500-1000/- kikal vel mai mai ah kizuak la hi chun la man a tawm e... Uicha le la tuk puai.

Sum neuchakhat mai dawina ziak in la thuneina zuak mang ziang kin aw...

~ Excerpt : Social Networking site

## **KNP HUANG**

### **Sum etkawldan Seminar**

Mata Pastor Bial KNP in Bial KNP Kikhawmpi hun ah thupukna a la neuu “Sum etkawl dan Seminar Programme” mat ding a lah ti’u chu March 30, 2024 (Kiginni) in Lingsiphai Kochuam Biak-In mun in a nei theiu’i. Seminar hun a hin Resource Person in Pro. Pastor Genlemthang Suantak a pang ah, Rev. Andrew LR Khiangte, Bialtu Pastor inle Practical a nei pi hi.



### **Frontline vena**

New Lamka Pastor Bial KNP in April 11, 2024 (Ningani) in Frontline ah khua pathum (3) Laika, Mualngat leh Lungdeiphai te vena nei in Pauchapna leh Kikhawp khawmna in hun a va mang thei ui. Zia hun a hin Vawk pum khat that in khua pathumte a hin a va hawmu a hi.



# KKP HUANG

## CENTRAL KHRISTIAN KHANGLAI PAWL

### Bial Report Khaikhawmna

#### 1. Kisimna :

Sl.No.	Kisimna	2022-2023	2023-2024	Punna (+) Kiamna (-)
1	Branch umzat	103	88	(-) 15
2	Khanglai Member zat -			
	Numei	1,976	1,974	(-) 2
	Pawsal	2,719	2,662	(-) 57
	<b>Gawpkhawm</b>	<b>4,695</b>	<b>4,636</b>	<b>(-) 59</b>

#### 2. Bial KKP nasepna (activities) tangpi -

Pastor Quarters' a ding malzin puan di chawk, Bial khenkhat te'n Semtu a chawmthei u'a, Bial Puitete'n Branch tin vethâkna lawktak ah neite, Branch kivetuana, Bial huap ah Bible Quiz, Children home vena, Blood donation bawl, Easter Sunday Sunrise Service leh Bial KKP Meet-te hi a hi.

#### 3. KKP Day 21st January, 2023 mat dan tangpi -

Bial khenkhat te'n KKP Day hi Branch tin ah Programme siam in a mang thei u'a, khenkhat in KKP Day hi a mang thei puau hi.

#### 4. CKKP Budget leh General Conference panpina -

CKKP Budget leh General Conference kithuapina KKP Member khat zel ah Rs. 10/- kumsin ah piak sek chu, Bial tam zaw te'n i pekim thei u'a, kipak um a kisa'i. Maleh, Gamsung buai ziak in Bial 2 in CKKP Budget a hung pethei pua'u a, Bial 4 in General Conference panpina a hung pethei tapua'u.

#### 5. Bial sung ah Branch te Kikhawp dan tangpi -

KKP Handbook in Kikhawp dan chuam chuam a ziltite a pat in KKP Kikhawpna hi neisek a hi; Sermon, Sharing, Group Night, Kumpulan Thuzilna, Lazil Kikhawp, Fellowship, Pauchap Kikhawp, Bible Quiz.